



REPUBLIKA E KOSOVËS/REPUBLIKA KOSOVA

GJYKATA KOMERCIALE

Numri i lëndës: 2023:187387

Datë: 12.02.2024

Numri i dokumentit: 05313490

KPPP.nr. 1369/23

GJYKATA KOMERCIALE E KOSOVËS, Dhomat e Shkallës së Parë, Departamenti për Çështje Ekonomike, Gjyqtari Arbër Rexha, në çështjen përmbarimore të kreditorit Reforma Sh.P.K., me numër unik identifikues 810533192 dhe seli në Obiliq, Shkabaj, rr. “Gjergj Fishta”, p.nr., të cilin sipas autorizimit e përfaqëson Zyra ligjore “Pro Juris Law Firm”, me seli në Prishtinë, kundër debitorit NTP “Univerzal – Comerc”, me numër unik identifikues 810682791 dhe seli në Vushtri, rr. “Hamit Hyseni”, duke vendosur lidhur me prapësimin e debitorit të ushtruar kundër Urdhrit Përmbarimor P.nr. 452/23, i lejuar me datë 26.07.2023, nga Përmbaruesi Privat Rezarta Metaj, me seli në Prishtinë, jashtë seancës, me datë 12.02.2024, merr këtë:

A K T V E N D I M

HEDHET POSHTË si i pa afatshëm prapësimi i debitorit NTP “Univerzal – Comerc”, me numër unik identifikues 810682791 dhe seli në Vushtri, i ushtruar ndaj Urdhrit Përmbarimor P.nr. 452/23, i lejuar me datë 26.07.2023, nga Përmbaruesi Privat Rezarta Metaj.

A r s y e t i m

Përmbaruesi Privat, duke vepruar sipas propozimit të kreditorit, mbi bazën e dokumenteve të besueshme, Ekstraktit nga librat afarist të datës 22.07.2023; Faturës nr. 325883, e datës 17.01.2023; Faturës nr. 325891, e datës 17.01.2023 dhe Faturës nr. 325913, e datës 17.01.2023, me të cilin është lejuar përmbarimi ndaj debitorit për arkëtimin e borxhit në shumë prej EUR 1,160.91, me kamatë ligjore prej 8%, nga dita e kalimit të afatit për pagesë, e deri në pagesën definitive, si dhe shpenzimet për përpilimin e propozimit për përmbarim dhe të gjitha shpenzimet tjera procedurale në vlerë prej 325.00 €.

Kundër këtij urdhri, debitori me datë 08.08.2023, ka paraqitur prapësim me të cilin e ka kundërshtuar urdhrin përmbarimor me arsyetimin se në propozimin për përmbarim nuk është paraqitur asnjë provë, ku ekstraktet nga librat afarist nuk paraqesin titull ekzekutiv dhe nuk kanë tipare të përmbarueshmërisë, ashtu që i njëjti nuk është pranuar, nënshkruar dhe vulosur nga ana e debitorit. Më tej, ka theksuar se dokumenti i besueshëm në bazë të së cilit është lejuar urdhri përmbarimor nuk ka titull ekzekutiv dhe nuk ka tipare të përmbarueshmërisë pasi që është i pa qartë dhe jo i saktë, madje nuk ka as dëshmi mbi përmbushjen e së njëjtës. Për këto arsye, i ka propozuar gjykatës që të aprovohet prapësimi i debitorit, ndërsa urdhri përmbarimor të abrogohet.

Kreditori, përmes përfaqësuesit të autorizuar në përgjigjen në prapësim ka theksuar se prapësimi duhet të paraqitet brenda shtatë (7) ditëve pas pranimit të vendimit përmbarues ose urdhrin përmbarues, ashtu që kanë kaluar më shumë se 7 ditë nga data e paraqitjes së prapësimin dhe si i tillë prapësimi i debitorit është i jashtë afatshëm. Ka shtuar se pretendimet e debitorit të paraqitura në prapësim nuk qëndrojnë për faktin se debitori nuk ka përmbushur në tërësi detyrimin lidhur me pagesën e borxhit si dhe të njëjtin nuk e ka kontestuar në asnjë rast, e poashtu ka pranuar edhe faturat mbi bazën e së cilave është lejuar urdhri përmbarimor. I ka propozuar gjykatës që të refuzojë prapësimin e debitorit si të pa bazuar, si dhe të obligohet debitori që të paguajë shpenzimet e përmbarimit.

Gjykata, pas shqyrtimit të shkresave të lëndës gjeti se prapësimi i debitorit është i pa afatshëm, për arsyet si në vijim:

Nga shkresat e lëndës rezulton se debitori me datë 31.07.2023 e ka pranuar Urdhrin Përmbarimor P.nr. 452/23, i lejuar me datë 26.07.2023, nga Përmbaruesi Privat Rezarta Metaj, fakt ky i cili vërtetohet nga fletë - kthesa për dorëzim personal të përmbaruesit privat e cila gjendet në shkresat e lëndës. Ndërsa, nga shkresat e lëndës, rezulton se debitori përmes postës rekomande, me datë 08.08.2023 ka paraqitur prapësimin ndaj këtij urdhri. Fakt ky i cili vërtetohet nga zarfi i postës me numër R 2579403.

Sipas dispozitës së nenit 70 të Ligjit për procedurën përmbarimore përcaktohet se *“Prapësimi duhet t’i paraqitet Gjykatës brenda shtatë (7) ditëve pas pranimit të vendimit përmbarues ose urdhrin përmbarues”*, ndërsa me nenin 126, paragrafi 2 të Ligjit për procedurën kontestimore, përcaktohet se *“Në qofte se afati është caktuar me ditë, përjashtohet nga llogaritja dita në të*

cilën ka filluar ngjarja ose koha nga e cila duhet të filloj afati, kështu që për fillim të afatit merret dita e parë e ardhshme.”

Në mbështetje të dispozitave si më lartë, si dhe nisur nga fakti se debitori urdhrin përmbarimor e ka pranuar me datë 31.07.2023, ndërsa afati për paraqitjen e prapësimit ka filluar të rrjedhë nga data 01.08.2023, rezulton se dita e fundit për paraqitjen e prapësimit ka qenë data 07.08.2023.

Prandaj, meqë debitori prapësimin e ka paraqitur me datën 08.08.2023 përmes postës rekomande, rezulton se debitori prapësimin e ka paraqitur pas kalimit të afatit ligjor, dhe rrjedhimisht prapësimi i debitorit është i pa afatëshëm.

Nga sa më sipër, gjykata në mbështetje të nenit 73, paragrafi 3 të LPP-së, si dhe nenit 13, paragrafi 1, pika 1.2 të Ligjit nr. 08/L-015 për Gjykatën Komerciale, vendosi si në dispozitiv të këtij aktvendimi.

GJYKATA KOMERCIALE E KOSOVËS

Dhomat e Shkallës së Parë - Departamenti për Çështje Ekonomike

KPPP.nr. 1369/23, datë 12.02.2024

Gjyqtari
Arbër Rexha

KËSHILLA JURIDIKE: Kundër këtij aktvendimi palët kanë të drejtë ankese në afat prej shtatë (7) ditëve, nga dita e pranimit të aktvendimit, në Dhomat e Shkallës së Dytë, në Gjykatën Komerciale të Kosovës, përmes Dhomave të Shkallës së Parë të kësaj Gjykate.